

दिनांक 29.10.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी कह्यो—देश मांय समुद्री हलका मांय लारला दस साल मांय ध्यानजोग बदलाव आयो।
- राज्यपाल हरिभाऊ बागडे विश्वविद्यालयां ऊं विद्यार्थियां री प्रतिभा अर कौशल ने और निखारण सारु कह्यो।
- आईआईटी जोधपुर रा वैज्ञानिक हवाई इंजनां सारु बेहतर किस्म री धातु री खोज कीनी।
- प्रदेश मांय शहरी अर ग्रामीण सेवा शिविरां रे मार्फत करीब 2 लाख पट्टा दिया ज्या।

000

प्रधानमंत्री नरेन्द्र मोदी कह्यो है के समुद्री हलको भारत रा विकास ने तेज बणा रह्यो है। वे आज मुंबई मांय भारत समुद्री सप्ताह 2025 रा तैत राख्यी ज्या सम्मेलन मांय बोल रह्या हा। श्री मोदी कह्यो के लारला दस साल मांय ई हलका मांय ध्यानजोग बदलाव आयो है। वे कह्यो के भारत रा समुद्री हलका मांय तेजी ऊं विकास व्हे रह्यो है। प्रधानमंत्री कह्यो के भारत रा बंदरगाह विकासशील देशां मांय सब ऊं बेहतर है।

-----

000

राष्ट्रपति द्रौपदी मुर्मू आज हरियाणा रा अंबाला वायुसेना टेशन ऊं राफेल लड़ाकू विमान मांय करीब 25 मिनट ताई उड़ान भरी। इण ऊं पैली वायुसेना टेशन पूगण परां राष्ट्रपति री गार्ड ऑफ ऑनर दे र अगवानी करीजी। फौज री सब ऊं ऊंची कमांडर राष्ट्रपति मुर्मू इण ऊं पैली अप्रैल 2023 मांय असम रा तेजपुर वायुसेना टेशन ऊं सुखोई-30 एमकेआई लड़ाकू जहाज मांय उड़ान भरी ही।

000

राष्ट्रीय राजमार्ग 919 माथे पाणी भर जावण री समस्या ने आगी करण माथे विचार करण सारु आज नई दिल्ली मांय आला दर्जा री मीटिंग व्ही। इण मांय केंद्रीय मंत्री नितिन गडकरी, भूपेंद्र यादव अर राव इंद्रजीत सिंह री मौजूदगी मांय गंदा पाणी रा निपटारा अर पर्यावरणीय संतुलन रा बारा मांय विगतवार चर्चा करीजी। मीटिंग मांय भिवाड़ी अर धारुहेड़ा मांय पाणी भर जावण री समस्या रो स्थायी समाधान करण माथे एकराय बणी। पर्यावरण मंत्री भूपेन्द्र यादव कह्यो के भारतीय राष्ट्रीय राजमार्ग प्राधिकरण-एनएचएआई ने बिरखा रो पाणी मसानी बैराज ताई पूगावण सारु स्थायी नाळा अर पाणी री निकासी रा मजबूत सिस्टम बणावण रा हुकम दिया ज्या है।

-----

000

राज्यपाल हरिभाऊ बागडे आज कोटा रा राजस्थान तकनीकी विश्वविद्यालय मांय स्टूडेंट एक्टिविटी सेंटर ने जनता ने सूप्यो। ई मौके वे कह्यो के नुवी शिक्षा नीति 2020 देश रा बौद्धिक बूता रो विकास करेला, जिण ऊं भारत विश्वगुरु बण सकेला। राज्यपाल विश्वविद्यालयां ऊं नवाचारां रा केंद्र बण र विद्यार्थियां री प्रतिभा अर कौशल ने बधावो देवण री अपील कीनी। वे व्यावहारिक ज्ञान हासिल करण माथे जोर दीनो।

-----

ई मौके उप-मुख्यमंत्री डॉ. प्रेमचंद बैरवा कह्यो के राज्य सरकार रो नौजवानां ने नौकरी धंधा दिरावण ऊं जुड़ी भणार्ई-लिखाई करावण माथे खास ध्यान है।

000

निर्वाचन आयोग जनता रा सुबीता सारू राष्ट्रीय मतदाता हेल्पलाइन अर सगळी 36 राज्य अर जिला-स्तरीय हेल्पलाइन चालू कर दीनी है। मतदाता मुफ्त नंबर 1800-11-1950 माथे रोजीना संवारे आठ ऊं मोड़ी सिज्यां आठ बज्यां ताई फोन कर सके है। आयोग बीएलओ सागे बुक-ए-कॉल सुबीतो ई सरू कीनो है। ई रे जरिये संबंधित बूथ लेवल अहलकार ऊं सम्पर्क कर्यो जा सके है। लोग शिकायतां कम्प्लेंट्स एट ईसीआई डॉट जीओवी डॉट आई एन बवउचसंपदजे/मबप.हवअ. पद ई-मेल पता माथे भेज सके है।

000

आईआईटी जोधपुर रा वैज्ञानिक हवाई जहाजां अर रॉकेट रा इंजिन बणावण सारू खास किस्म री धातु बणायी है। इण ऊं जहाजां रा इंजिन रो वजन करीब आधो रह जावेला अर तेल खपत कम व्हेला। आ धातु 900 डिग्री सेल्सियस ताई रो तापमान ई सहन कर सकेला।

000

प्रदेश मांय लगाया जा रहया शहरी अर ग्रामीण सेवा शिविरां रे मार्फत 17 सितम्बर ऊं 25 अक्टूबर ताई करीब 2 लाख पट्टा बांटी ज्या है। जनता ने पौने दो लाख ऊं बत्ता मूल निवास प्रमाण पत्र अर 2 लाख ऊं बत्ता जाति प्रमाण पत्र दिया ज्या। ई सागे ई 17 लाख ऊं बत्ती किशोरियां अर आस वाळी लुगाइयां रा शरीर मांय खून री कमी री जांच करीजी।

शिविरां मांय 2 लाख 67 हजार ऊं बत्ती मंगला पशु बीमा पॉलिसी ई जारी करी जा चुकी है।

000

कृषि मंत्री डॉ. किरोड़ी लाल मीणा किसानां ने बेहतर क्वालिटी रा बीज, खाद अर कीड़ा मारण री दवाइयां मुहैया करावण रो संकल्प दोहरायो है। वे हनुमानगढ़ मांय खेती-किसानी ऊं जुड़्या निरीक्षण रे दौरान घटिया किस्म री सामग्री देवण वाळी कम्पनियां ने करडी कार्रवाई सारू चेतायो। मंत्री जांच रे दौरान नियमां ने नी मानणो मिलबा परां दो फर्मा रे खिलाफ कार्यवाही कीनी।

000

रीको राइजिंग राजस्थान ग्लोबल इन्वेस्टमेंट समिट-2024' रा तैत सरकार सागे करार करण वाळा निवेशकां सारू प्रत्यक्ष आवंटन योजना रो छठो दौर ई थावर ने सरू करेला। ई सारू निवेशक 13 नवम्बर ताई ऑनलाइन तरीका ऊं अर्जी दे सकेला। ई दौर सारू ई-लॉटरी 18 नवम्बर ने निकाली जावेला। ई दफा जयपुर, जोधपुर अर बीकानेर जिलां मांय रीको रा 100 औद्योगिक हलकां मांय करीब 6 हजार औद्योगिक प्लॉट मुहैया कराया जावेला।

000

राज्य रा मौसम मांय आज ई बदलाव निजर आयो। सवाईमाधोपुर मांय बिरखा रुकण अर तावड़ो निकळबा ऊं साता मिली, जदके बालोतरा, जालौर अर पाली जिलां मांय आखा दिन बादळा मंड्या रहया अर छांटो-छिड़को व्ह्यो। सिरोही जिला मांय बिरखा ऊं पारो उत्तर्यो, जिण रे कारण ठण्ड रो असर बध ग्यो। ई बिरखा ने गेहूं अर सरसों री साखां सारू फायदेमंद मानी जा रही है, हालांकि कपास री साख ने नुकसाण व्हेवण री शंका है। बाड़मेर मांय ई बादळा मंड्या रेहवण अर सीळो बायरो बाजण ऊं ठण्ड रो एहसास व्हेवण लाग्यो।

000

लौहपुरुष सरदार वल्लभभाई पटेल री डोढ़ सौ वीं जयंती रा सिलसिला मांय जयपुर मांय थावर ने 'एकता मार्च' निकाळ्यो जावेला। युवा मामलात अर खेल विभाग रा शासन सचिव डॉ. नीरज के. पवन आज इण री तैयारियां रो जायजो लीनो अर अहलकारां ने ज़रूरी हुकम दीना। मार्च संवारे 6 बज्यां गांधी सर्किल ऊं सरू व्हे र बिड़ला मंदिर, रामबाग सर्किल अर अंबेडकर सर्किल व्हेतो थको अमर जवान ज्योति माथे पूग र पूरो व्हेला। केंद्रीय श्रम, रोजगार, युवा कार्यक्रम अर खेल मंत्री डॉ. मनसुख मांडविया आज सिंज्या नई दिल्ली मांय ई साल रो आकाशवाणी सरदार पटेल स्मृति व्याख्यान देवेला। सूचना अर प्रसारण राज्य मंत्री डॉ. एल. मुरुगन ई कार्यक्रम मांय मौजूद रेहवेला। व्याख्यान री रिकॉर्डिंग 31 अक्तूबर ने सरदार पटेल री जयंती रे मौके आकाशवाणी रा पूरा नेटवर्क ऊं प्रसारित करी जावेला।

000

दौसा री श्यालावास जेल रा बंदी राष्ट्रीय एकता दिवस अर सरदार वल्लभ भाई पटेल री डोढ़ सौ वीं जयंती रे मौके जेल रा आंगणा मांय भारत रो नक्शो बणायो। इण मांय स्टैच्यू ऑफ यूनिटी री नकल रख र सरदार पटेल ने सिरधाभाव सागे याद करी ज्या।

000

प्रदेश मांय आज गोपाष्टमी धार्मिक उमाव अर रीत मुजब मणायी ज्यी। ई मौके जातरू गौशालावां मांय गायां री विधि-विधान सागे पूजा कीनी अर वां ने हर्यो चारो, गुड़ अर चणा खिलाया। भरतपुर री गढ़ी सांवलदास गौशाला सागे ई भुसावर मांय ई मोटी तादाद मांय जातरू पूग्या। ई मौके केई ठोडां अन्नकूट महोत्सव ई राख्यी ज्या।

000

जयपुर री रिजर्व पुलिस लाइन मांय 75 लाख रुपया रा खर्च ऊं बणायी ज्यी डिजिटल लाइब्रेरी आज सुरू व्ही। जयपुर रा पुलिस आयुक्त सचिन मित्तल अर ऊर्जा विभाग रा प्रमुख शासन सचिव अजिताभ शर्मा इण रो उद्घाटन कीनो। ई मौके पुलिस कमिश्नर कह्यो के आ लाइब्रेरी पुलिस वाळां री काम री काबिलियत अर बूतो बधावण मांय मददगार साबित व्हेला।

000

राजस्थान कर्मचारी चयन बोर्ड री ओर ऊं 2 नवंबर ने ग्राम विकास अधिकारी-वी.डी.ओ. सीधी भर्ती परीक्षा-2025 ली जावेला। संवारे 11 ऊं दोपहरां पाछे 2 बज्यां ताई ली जावण वाळी ई परीक्षा सारू जयपुर मांय अढाई सौ केन्द्र बणायी ज्या है।

000

केंद्रीय संचार ब्यूरो कोटा री ओर ऊं बूंदी रा पीएमश्री राजकीय उच्च माध्यमिक विद्यालय मांय दो दिन री मल्टीमीडिया प्रदर्शनी लगायी जा रही है। ई प्रदर्शनी मांय केंद्र री मौजूदा सरकार री 11 साल री उपलब्धियां, 'जीएसटी बचत उत्सव' अर 'राष्ट्रीय एकता दिवस' रा बारा मांय जाणकारी दी जावेला। प्रदर्शनी मांय न्यारी-न्यारी सरकारी योजनावां री जाणकारी देवण सारू तकनीकी सत्र राख्या जावेला अर 'राष्ट्रीय एकता' रा मुद्दा माथे होड राख्यी जावेला।

000

आज विश्व स्ट्रोक दिवस है। ई मौके केंद्रीय स्वास्थ्य मंत्री जगत प्रकाश नड्डा सोशल मीडिया पोस्ट रे जरिए कह्यो के ओ दिन स्ट्रोक री रोकथाम अर स्वस्थ ज़िन्दगी जीवण रा तरीका रा महत्त्व रा बारा मांय जाग जगावण रो मौको देवे है।

000